

Aktuells: Dor Vürstand hat fei getoocht!

Am 12.11. hat siech dor Vürstand getroffn. Zen erschtn gings im de Märchnweihnacht un unnere Bud. Dor Aufbau un de Besetzung is beredt wurn un de nutwending Getänkle wie unner bester Gliehweih sei betellt un aa de Spackfett- un de Schiebeckerbemme wern schu geschmiert.

E ganz wichtiger Punkt war aa de Diskussion ieber de Zukunft, vor alln ieber de Lokalitäten, wu unnere Hutnobnde stattfindn sölln.

In Vorstand war is erschte Mol de Kerstin mit dorbei, weil – die söll ja im Januar zen Nachfolcher vun Schmidti eigeführt wern, weil dar de Voreinskass in neie Händ obgabn will. Nooch meh als 30 Gahr hat dar genuch Gald gezählt, itze muss mal jemand annersch unnern Zaster zamhalt'n un behietn!

Na, un de Terminle vun Jahrplan 2025 wurn aa schu mol dargeleecht.



Herzlichen
Glückwunsch zur
Ehrenmedaille
für unsere
Undine Göbler



FAHRDIENST

Wer am 05.12.2024 abgeholt und auch **wieder nach Hause** gefahren werden will, der möchte bitte bis 14:00 Uhr anrufen:

Matthias Schürer

Tel.: 2666

oder

Uta Schmidt

Tel.: 2395



Erzgebirgischer Heimatverein
Eibenstock e.V.
Otto-Findeisen-Str. 14
08309 Eibenstock

Tel. 037752 / 2666 oder 2141
Internet:
www.heimatverein-eibenstock.de

Bankverbindung:
Erzgebirgssparkasse
IBAN: DE90 8705 4000 3892 2072 58
BIC: WELADED1STB

Unner Blatt`l



Nummer
237

Mitteilungsblatt des
Erzgebirgischen Heimatvereines
Eibenstock e.V.

Dezember
2024



**All unnern Mitgliedern un Freindn wünsch'n mir ne fruhe,
besinnliche Weihnachtszeit sowie viel Gesundhaat un allis
ordenklich Gute for`s neie Gahr 2025!**

Haste schu gehert, des...

*Wuhar waßte dä des schu wieder? War hat dä dir des gesaat?
Des glaab iech itze fei net!*

Esu ähnlich giehts halt immer wieder, wenn mor siech aamol im Monat trifft. Un des is ja aa net schlimm, sonnern sugar hilfreich, wens siech im wos Neies, aber hoffntlich aa Wahres hannlt. Desserhalb haaßt des ja aa Hutznobnd un söll zur Unnerhaltung in dor Voreinsgemeinschaft beित्रon.

Aber mannichsmol muss mor aa mol zuhörn, wenn dor Vürstand wos ze berichtn hat, denn des is oftmoles dorwagn wichtich.

Un dann gib'ts ja aa fast zu jeden Hutznobnd e paar Bilder oder Viedjos vu de letztn Doreignisse im Vorein. Des müsst ja eingtlich for jeden, dar immer dorbei is, intressant sei. Un do sollt mor abn aamol hieguckn un draufhern, wens dorzu noch e paar Wort ze sogn gibt, wie z.B. e Dankeschön for de schenn Bilder oder des klaane Filml. Die paar Minutn kaa mor schu mol aufmerksam sei, denk iech. Dornooch is immer noch Zeit, is Neiste ze berichtn un vu eichne Dorlabnisse ze dorzähl.



Apropo immer dorbei sei: Iech kaa miech dorinnern, des des in dor Vorgangehaat eingtlich besser geklapt hat: unnere Älteren ham ken Obnd vorpasst, die warn immer do, des war wie e klaans Gesetz. War krank, im Urlaub oder wagn sinstwos Wichtsches unnerwags sei muss, do is des ja normal un ze vorstieh. Is is när, for die, die den Obnd jeds mol vürbereitn müssn, die brauchn wenichstns ugefah de Gewisshat, wie viel Mitglieder dorbei sei. Des is wagn dor Vorsorching schu wichtich.

Un Wenn mir im neie Gahr neine Q-Stall, Spartnheim oder Hotel „Am Bühl“ mol in Hutznobnd ohalt'n woll'n un müssn, weils gar net annersch meh gieht, is de Azahl dor Teilnammer noch emol su wichtich. Denn die Gastwirt müssn mit ihr'n Imsatz ihre Leit gut bezohl'n.

Mir wissen alle, des allis wahrscheinlich noch eweng teierer werd un net jeder grod im Gald schwimmt, aber aamol im Monat ze unnern gemietlich'n Traff'n ka mor bestimmt emol wos Assn un Trinkn, dodormit allezam gut mitenanner labn kenne – mir als Vorein un de Gastwirtn gleichermaßn.

Denkt mol drieber nooch – Eier Schmidt!

Wir gratulieren unseren Heimatfreunden

Karin Weidlich	am 03.12.	zum 73. Geburtstag
Monika Jung	am 13.12.	zum 65. Geburtstag
Sigrid Oswald	am 14.12.	zum 75. Geburtstag
Erika Nötzold	am 22.12.	zum 85. Geburtstag
Lothar Richter	am 22.12.	zum 63. Geburtstag
Holger Wiech	am 30.12.	zum 64. Geburtstag



*Wir begrüßen ganz herzlich Heidemarie Gruszynsky
als neues Vereinsmitglied*

*Glauben Sie nichts von dem, was Sie hören,
und nur die Hälfte von dem, was Sie sehen!*

~ Edga Allan Poe ~

*Unnere Weihnachtsfeier is wieder im
Hotel „Am Bühl“*

am Donnerstich, ne 05.12.24

ab 18.00 Uhr

*Nicht vergessen: Bringt alle bitte wie
alljährlich ein kleines Geschenk mit!*

(Wert ca. 10 €)

Anmeldezettel nicht vergessen!



De Jahreshauptversammlung 2025

am Donnerstich, ne 09.01. 25

um 18.00 Uhr, is im Q-Stall



125 Gahr Dünsbergverein Biebertal e.V. Mir warn dorbei

Wie de meest'n von unnerer Mitglieder wissen, ham mir in Hessen unneren Partnerverein, was dr Dünsbergverein Biebertal e.V. is. Gleich nooch dr Wende ham mir unnerenanner freundschaftliche Beziehung aufgebaut, die bis heit ahdauern. Mir besuchn uns fast jeds Gahr gegenseitich und unner Vorein is dies Gahr eigelodn wurn, weil is 125-jährige Jubileum vom Dünsbergverein gefeiert wurn is. Und su bie iech mit meiner Fraa Ulrike und in Hubert am 1. November viermittich halb elfe beim schennstn Sonnenschein nooch Biebertal gefahrn. Unner Chef, dr Matthias war leider krank und kunnt net mietfahrn. Aakumme sie mir dreie in Biebertal bei grauerlichn Regnwatter.

In dr Unnerkunft, im „Landgasthof zum Dünsberg“ - eher bekannt unter „Beim Paul“ – warn schu vornewag de Zimmer reserviert und obwohl de Gaststüb zu war, ham mir erscht emol in Kaffee serviert bekomme. Bis zur Festveranstaltung war noch Zeit und su ham mir uns noch a bissl de Gegnd ahgeguckt. Halb Achte nocherts ging de Veranstaltung lus. Mir sei wie immer sehr



herzlich begießt wurn, de Platz warn schu for uns reserviert und festlich hargericht. Unnerer Bürchermaster, dr Uwe Staab mit seiner Fraa, warn natierlich ah nooch Biebertal komme un saß'n mit bei uns am Tisch. Durch's Programm hot dr zweete Vorsitnde Cenneth Löhr gefiert un hot des gemänetscht wie a professioneller Moderator. Neb'n musikalischer Unterhaltung sei etliche Grußworte gehalten wurn, unner Annern natierlich

von unnerm Bürchermaaster und vom Hubert, er hot'n Matthias würdich vortraatn, un klaane Gastgeschenke hattn de Eibnstocker ah überreicht. Nooch dr Veranstaltung gobs allerhand ze dorzöhl'n mit de Biebertaler Leit und es is aah su mannichs Glas Wein, Sekt oder Bier getunkn wurn, allerdings musstn de Kellner oft laafn, weil in de Biergläser blus 0,2 Liter nei gange sei. Es is alles in alln a sehr schiener Obnd gewaasn. Mir hattn vornewag schu geplant noch in Tog länger ze bleibn, weil mir noch a bissl wos in Biebertal ahguckn wolltnt. Un su sei mir spontan noch für'n Samstichobnd zum Konzert von nor Bänd, also von ner Kapell eigelodn wurn, die irische Musik spielt. Is is ah a schiener Obnd gewasn un in de Biergläser is desmol a bissl meh neigange, noch dorzu Guinness-bier. Alles in alln warn's zwee schiene Tog. De Gastfreundschaft von unnerer Biebertaler Freunde war wie immer hervorragn. Ze unneren Weihnachtmarkt-wochnend in Eibnstock dorwartn mir wieder uhgefahr 40 Biebertaler Gäst von Dünsbergverein. Se sei be uns herzlich willkomme und se freie siech drauf, vor alln a auf'n „Nikolaschka“ an unnerer Bud unt'n aufn Marktplatz.



Ulrike und Thomas Maixner (ins erzgebirgische übersetzt M. Schürer)

Dor 2. Bargbaulehrpfod is eigeweiht wurn!

Esu ne große Feier wie dozemol zen erscht'n Bauabschnitt vu unneren Bargbaulehrpfod an 15.07.21 gobs diesmol net. Aber trotzdem wurd aa dor 2. Taalabschnitt würdich eigeweiht: Unner Bürchermaaster Uwe Staab, dor Projektchef Thomas Helm, viele Voreinsmitglieder, dor zustandsche Revierferschter un natierlich aa Vortreter von dr Presse un ERZ-TV warn zen Treffpunkt „Parkplatz am Gerstenbergweg“ dorscheine. Dodormit wurd nooch 3 Gahrn Bauzeit eischließlic nor Menge Stundn for allis an Organisatschjon, mit viel Umhaartelesoniererei un Schriftkram for de Fördermittl, dor zweete Abschnitt von den Lehrpfod doröffnt. Nooch nor kurz'n Aasprooch un Dank von Bürchermaaster iebernoht dor Thomas als vorantwortlicher Cheforganisator de Rechie un hat allesamt zen Dorkundungsrundgang eigelodn. Aa mit den neie Abschnitt kaa mor ganz tief in de Bargbaugeschicht vo unneren Eimstock eitauchn.



Des ganze Geländ birgt noch viel Gehahm'niss un is, seitdam dor letzte Bargmaa 1824 ausgefahrn is, uverännert. Nār de Natur war flei'sich un hat siech ieber de Jahrhunnerte

des klaane Waldstick zerickdorobert un de Gräbn, Haldn un Wasserläif ieberwuchert. Die eh'mols vorhandne Bautn sei nu seid lange vorott un machis kaa mor nār noch in söliche geologschn Luftaufnahme dorkenne. Jede Menge Historischs läßt siech of den Rundgang dorkenne un is an die viel Hinweistofln un Abbildunge, aber aa durch schiene Holzbautn, ne Seifenstell am Bach unneren Meiler im Quarschnitt gut dargestellt. Sugar in paar mittelalterlich Bargleitn kaa mor bein Arbitn begegne. Auf nern Zeitstrahl wern die ganz'n Doreignisse vu dor Bargbaugeschicht eigeordnt. War itze neugierich gewurn is, dar kaa aafach dortn hie fahrn, des is bestns ze empfehln. Vun Parkplatz an Gerstenbergweg se is ugefahr 100 m bis zen Eigang.



(ins erzgebirgische übersetzt G. Schmidt)

For ne Rundgang braucht mor ca. 1 bis 1,5 St., un weils ieber Stock un Staa, schmole Waldweg un Treppn auf un ab gieht, is fests Schuwark dorforderlich. Viel Spass bein Dorkundn un vopasst aa net in 1. Taal von Rundgang des wünsch de Susanne Schlesinger.

Klaane Eul un gewicklte Baamle



Wenns draußnim schu eweng kalt un ugemietlich werd, racht naablt un dodorzu aa noch esu zeitich finster wird – do is November un bei uns im Vorein Bastln aagesaat. Ne ganze Zeit vornewag wird schu getiflt un ieberleecht, wos kennt mor dä diesmol machen, wos hatt mor noch net in de annern Gahrn? Un do kame unnere Vübereiter of die klenn Euln un de Baamle.

Is muss ja allis machbar sei, su des e jeds vu uns des aa zambrengt.

Tja, aber die Euln brauchtn ja aa ne Mitz, wenns geht aa noch mit ner Bumml ubn drauf! Des Gestrick geht aber net im Vorein – erscht emol bringt des nu net grad jeder un de Zeit



reicht aa net dorzu an den Obnd. Also, wos bleibbt uns do annersch ieblich, als des e paarle die Dinger vornewag aarichtrn. De Sabine, de Uta un de Andrea ham halt mannich Obnd lusgestrickt un su Sachzich Stick fertich hiekrich. Un itze kimmt de



schnenste Idee vu de Bastler: alle Zutaten wie de Mitz, fertich Ausgeschnitts un dar Korkkörper vu dar zukünftichn Eul kimmt allis neinern Beit! Un su krichs jeder, dodormits kaa Gerangel bei dor Auswahl gibt. Des hat gut funktsjuniert. An dor Wand warn noch e paar Bildle, wies zen Schluss aus-



sah söllt un dann gings aa schu lus, mit vieln Hieweisen un Ratschlächn, wos mor ze dorledign hat. Allezam ham siech viel Mieh gabn, domit die Eul gut aussieht un gut guckn kaa mit ihre Aagn. Ganz zen Schluss muß jeds mit dare Eul un dor Bummel -



mitz zu nern Schießeisen – suner Klaberpistol - komme, also do wurd när eweng haaß geklabt, net geschossn! Do bleibbt de Mitz wenstns dauernd of den Kopp un rutscht nimmer runner. Per Vidjo gobs in klenn Film vun Bargbaulehrpfod un en von unnere Ausfahrt. Do ham dorwagn de meestn aufmerksam zugeguckt.



lech bi schu gespannt, wos mir im nächstn Gahr bastln - dor Schmidt!

